

# Vischnaunca politica Andiaast

---

## **Radunonza communal dils 21 da mars 2014**

Presents: 18 vischinas e vischins d'Andiaast e la suprastonza communal  
Perstgisas: Priska Capaul, Gierina Blumenthal

Sco usitau tier l'emprema radunonza communal digl onn fa nies president in plaid d'avertura. El seregorda da nos defuncts Sgier Jakob, Derungs-Killias Maria Julia, Vincenz-Derungs Maria Anna, Vincenz-Derungs Jakob Alois, Schlosser-Sgier Norbert, Sgier Angelica. Egl onn 2013 ha ei dau sulettamein ina naschientscha, numnadamein Robin Meier-Spescha, \*20-11-2013.

Plinavon fa president Sievi Sgier ina retrospectiva dil curriu e passau il davos onn. El fa menziun dils projects ch'ei sin rucca, sco era dils projects previ pils proxims onns.

Sco davos engrazia el a tut ils officials da vischnaunca ch'ei s'engaschai e s'engaschan pil beinstar da nossa vischnaunca, sco era a tut ils commembers dallas uniuns dil vitg ed a tuttas vischinas e vischins che s'engaschan en ina moda ni l'otra.

### **1. Beinvegni ed elecziun dils dumbravuschs**

President communal Sievi Sgier fa in cordial beinvegni tier las fatschentas publicadas. Sco dumbravuschs vegnan Corina Sgier ed Imelda Vincenz proponi ed elegi unanimamein. Encunter la gliesta da tractandas dat ei neginas objecziuns.

### **2. Prelecziun ed approvaziun dil protocol dils 6 da december 2013**

Il protocol dalla davosa radunonza communal dils 6 da december 2013 vegn prelegius ed approbaus unanimamein.

### **3. Damonda da credit per in niev plaz da giug**

Sin incarica dalla suprastonza communal ha signur Beat Meier, Andiaast elaborau in project per sanar il plaz da giug sut la casa da scola. Signur Meier presenta il project detagliadamein cun agid da plans e maletgs. Ils cuosts totals muntassen a frs. 20'791.55. La vischnaunca sa quintar cun donnaziuns da sponsurs e contribuziuns cantunalas da totalmein frs. 11'988.00. Aschia ch'ei restass alla vischnaunca la summa restonta da frs. 8'800.00.

La radunonza communal approbescha il credit necessari da frs. 21'000.00 unanimamein. President communal Sievi Sgier engrazia a signur Beat Meier cordialmein per siu engaschi.

### **4. Damonda da credit dall'ASA Sablun per la sanaziun dalla lingia da canalisaziun dalla via d'Andiaast**

Cun scriver dils 4 da mars 2014 tschenta l'associaziun per serenar l'aua piarsa ASA Sablun, Rueun la damonda da credit per la sanaziun dalla lingia da canalisaziun en la via d'Andiaast. Numnadamein ei l'ASA cumpigliada vid la part dalla punt dil Flem. Ils cuosts totals muntan a frs. 85'000.00. Per la vischnaunca d'Andiaast munta quei ad ina summa da frs. 17'388.20. President communal Sievi Sgier orientescha ch'ei seigi usitau da dumandar il credit nett sch'ei detti neginas subvenziuns cantunalas e federalas.

Sin fundament da quellas informaziuns approbescha la radunonza communal unanimamein il credit necessari da frs. 17'500.00.

## **5. Consultaziun davart la lescha da turissem**

Las vischnauncas Andiast, Breil/Brigels, Ilanz/Glion, Lumnezia, Mundaun, Sursaiassa e Waltensburg/Vuorz han elaborau communablamein in sboz per ina nova lescha davart las taxas da hosps e taxas turisticas. Tala sebase sin las duas petgas da finanziaziun d'entochen ussa, numnadamein la taxa da cura (niev taxa da hosps) e la taxa per la promoziun dil turissem (niev taxa turistica). President communal Sievi Sgier informescha cuortamein davart il sboz e davart las midadas impurtontas. Cun la broschura repartgida e cul sboz dalla lescha e dallas disposiziuns executoricas che san vegnir retratgas tier la canzlia communal ni sin la pagina d'internet dalla vischnaunca vegn fatg ina consultaziun en caussa che cuozza entochen ils 15 d'avrel 2014. Venderdis, ils 4 d'avrel 2014 ha liug ina sera d'informaziun publica en halla ad Andiast.

Signur Raimund Spescha pren il plaid e sereferescha sin la midada dalla lescha da turissem egl onn 2003, nua che la suprastanza communal hagi adattau tala cun survargar sias cumpetenzas. Signur Spescha pretenda che las disposiziuns executoricas, las qualas fixeschan denter auter definitivamein las taxas, vegnan medemamein approbadas dalla radunonza communal. Il president communal, Sievi Sgier pren enconuschientscha ed orientescha che quei vegn ad esser il cass.

## **6. Informaziun davart il revier forestal ed il scolaesser**

President communal, Sievi Sgier orientescha cuortamein davart la nova organisaziun dil revier forestal. Numnadamein han las vischnauncas da Vuorz, Andiast e Mundaun furmau in revier forestal che surdat tut las incumbensas sco tochen dacheu al revier forestal dalla vischnaunca da Ilanz/Glion. L'administraziun da tal revier vegn exequida dalla canzlia communal a Vuorz. Persuna da contact resta vinavon Josef Dietrich.

Plinavon vegn la corporaziun da scola Rueun e conturon sligiada sin la fin digl onn da scola 2013/14. Niev vegnan mo in cussegl scola ed in meinascola ad esser resposabels per il scolaesser dall'entira vischnaunca Ilanz/Glion. Per la vischnaunca d'Andiast vegn elaborau in contract da prestaziun davart il qual vegn votau a caschun d'ina dallas proximas radunonzas communalas.

## **7. Varia**

Ord miez dils vischins vegn deponiu la damonda tgei che succedi cun las contribuziuns per plazs da schurmetg che vegnan pagadas da personas privatas ch'ein deliberadas da construir tals en casa. Tenor savida dalla canzlia communal flessegian quels daners tier il cantun Grischun. La canzlia communal vegn a sclarir detagliadamein en caussa.

Finiziun dalla radunonza allas 21.50 uras.

Andiast, ils 21 da mars 2014

Il president:

Il canzlist:

Sievi Sgier

Gian Carlo Albin